

**Naslov:** ADS FBiH: Konferencija „Stručno usavršavanje i razvoj kompetencija“  
**Izvor:** Fena.ba, [www.fbihvlada.gov.ba](http://www.fbihvlada.gov.ba)  
objavljeno 25.3.2019. godine

U organizaciji Agencije za državnu službu Federacije Bosne i Hercegovine (ADS FBiH) – uz finansijsku podršku Vlade Ujedinjenoga Kraljevstva – u Sarajevu je održana Konferencija „Stručno usavršavanje i razvoj kompetencija“. Konferenciju je otvorio i sudionike pozdravio direktor ADS-a FBiH Refik Begić koji je prisutne informirao o aktivnostima Agencije na području stručnoga usavršavanja državnih službenika, saopćeno je iz ADS-a. - Jedan od strateških pravaca djelovanja Agencije je ustroj kompetentne i profesionalne javne službe u Federaciji Bosne i Hercegovine koja pruža učinkovite usluge građanima - naglasio je Begić. On je govorio i o zakonskom okviru u kojemu djeluje Agencija za državnu službu FBiH pritom ocijenivši da je taj okvir prilično kompliciran. Ustvrdio je da je i fragmentiranost javne uprave u FBiH otežavajuća okolnost za rad Agencije kojoj je na čelu.

Ključne nalaze istraživanja u oblasti javnih nabavki u Bosni i Hercegovini prezentirali su Dragana Kovačević i Saša Radetić. Njihova je temeljna opaska da je oblast javnih nabavki u BiH bremenita manjkavostima koje je potrebno što prije riješiti. Akreditirani trener pri Nacionalnoj akademiji za javnu upravu Vlade Republike Srbije Tatjana Dragosavac je govorila o razvoju i jačanju trenerskih kompetencija putem koučinga, a šefica Odsjeka za obuku i usavršavanje ADSa FBiH Samra Ljuca je prezentirala tehnike podučavanja odraslih. Vlastita iskustva u planiranju i realiziranju obuka iznijela je eksterni trener ADS-a FBiH Mila Eminović-Rizvanović.